

LISTOVI GRAČANIČKOG KALENDARA OD 4. 5. 2007. DO 25.11.2007.

OMER HAMZIĆ
.....

9. 5. 2007.

Gračanica proglašena Evropskim gradom u BiH za 2007. godinu

Centralnu manifestaciju obilježavanja Dana Evrope u Bosni i Hercegovini pod nazivom "Bosna i Hercegovina za Evropu", Evropski pokret u Bosni i Hercegovini ove godine organizovao je u Gračanici. Osim Gračanice, pokrovitelji manifestacije bile su općine Zenica, Žepče i Zavidovići, zatim Radio Federacije Bosne i Hercegovine, a manifestaciju je podržala i ambasada Slovačke Republike u Sarajevu.

Pored kulturno-umjetničkog programa u kojem je učestvovala poznata operna pjevačica Ana Babić obavljeno je i svečano proglašenje i dodijeljena su priznanja evropski najaktivnijim građanima, gradovima, organizacijama i institucijama: za Evropski grad u BiH za 2007. godinu proglašena je Gračanica, a za evropskog načelnika u BiH proglašen je Općinski načelnik Nusret Helić.

"Iskustva zemalja koje su stupile u Evropsku uniju pokazuju puteve napretka svih naroda i država koje svoje međusobne odnose izgrađuju na spomenutim, sada već govorimo, evropskim principima. Otvorenošću za sve dobronamjerne ljude, zbližavanjem sa našim bratskim evropskim gradovima – Florijem iz Francuske, Formiom i još nekoliko gradova iz Italije, mi u Gračanici pokušavamo doprinijeti afirmaciji tih principa.

I ova današnja manifestacija, koju smo simbolično nazvali "Bosna i Hercegovina za Evropu" pokazuje u kojoj smo mjeri i kao ljudi i kao grad već na evropskom putu", rekao je, pozdravljajući prisutne na ovoj manifestaciji, načelnik općine Gračanica Nusret Helić.

10. 5. 2007.

"Klaus Lehman" Gmbh: počele pripreme firme za dobijanje sertifikata ISO standard 9001/2000

Pripremu ove firme za "certificiranje", koja se, inače, bavi izgradnjom, montažom i ugradnjom elektro i elektronske opreme širom Bosne i Hercegovine, kao i obuka i edukacija tridesetak zaposlenih za standardiziranje sistema upravljanja vrši Agencija "Idea" iz Gračanice. Prema ugovoru koji je potpisan 6. 4. 2007. godine čitav posao treba da se završi do kraja godine. Cilj je da se kvalitetom i brzinom pružanja usluga u potpunosti ispunje očekivanja kupaca i poslovnih partnera.

15. 5. 2007.

"Širbegović grupa": veliki posao u Nišu...

Potpisan ugovor za izgradnju trgovačkog centra "Merkator" u Nišu, u vrijednosti od preko 3 miliona eura. Radi se o objektu površine 32.000 kvadratnih metara. Pri izgradnji objekta koristit će se montažna AB konstrukcija "Širbegović", koja se kombinuje sa čeličnom konstrukcijom i

klasičnom gradnjom.

20. 5. 2007.

Deseti jubilarni festival dječjeg dramskog stvaralaštva: 13 učesnika iz svih dijelova BiH

Od 18. – 20. maja 2007. godine u Velikoj sali Bosanskog kulturnog centra u Gračanici održan je 10. Festival dječjeg dramskog stvaralaštva Bosne i Hercegovine. Ove godine su sa 22 dramske izvedbe, učestvovala dječje dramske skupine iz: Tuzle, Sarajeva, Tešanja, Mostara, Brčkog, Ilidže, Čelebića, Konjica, Zenice, Banja Luke, Bugojna, Srebrenice i grada domaćina Gračanice.

Organizatori Festivala bili su Centar za dramski odgoj BiH iz Mostara, Javna ustanova Bosanski kulturni centar Gračanica i Kulturno umjetničko društvo "Adem Alić" iz Gračanice, a generalni pokrovitelj bila je Općina Gračanica.

Stručni žiri je dodijelio 10 diploma i to: za kreativnost i slobodu dječje igre Tariku Džiniću u predstavi "San o livadici" - OŠ "Hasan Kikić" Gračanica; za scenski pokret predstavi "Tajna zlatnog Sunca" - Centar urbanog življenja Sarajevo; za artikulisan i odvažan govor na sceni - predstavi "Glas djetinjstva" - Bosansko pozorište Tešanj; za hrabrost i ideju u realizaciji predstave "Eko problem u zemlji bajki" Sabitu Agiću iz Treće osnovne škole Ilidža; za najmaštovitiji i najkreativniji kostim - predstavi "Svaštarije i maštarije male Pipi" - Osnovna škola "Hasan Kikić" Gračanica; za pedagoški rad Bogdanu Simiću na predstavi "Srećko" - Lutkarsko pozorište "Cvrčak" Ugljevik; za originalnost i spontanost dječje igre predstavi "Ukradeni princ" - Teatar "Fedra" Bugojno; za korištenje minimalističkih izražajnih sredstava koja rezultiraju snažnom vizuelnošću - predstavi "Džonatan Livingston" - OŠ "Čengić Vila 1" Sarajevo; za diskretno vođenje dramsko-pedagoškog procesa koji rezultira radošću dječje igre Amri Prutini u predstavi "Slavuj" - Mostarski teatar mladih; za originalnost ideje i uspješno kombiniranje teatarskih poetika - predstavi "Djevojčica iz naše ulice" - KUD "Adem Alić" Gračanica i za kreativnost i slobodu dječje igre - Jasminki Dizadrević u predstavi "Crvenkapa i zbunjeni vuk" Amatersko pozorište "Neretva" Konjic. Stručni žiri dodijelio je pohvale Bosanskom narodnom pozorištu Zenica za predstavu "Pinokio" i Dječji-

jem studiju "Roda" Banja Luka za predstavu "Veselo igralište".

Prema odluci organizatora, naredne godine se očekuje prethodni postupak selekcije predstava, kao i još neke novine u organizaciji Festivala.

31. 5. 2007.

Sa 28. redovne sjednice Općinskog vijeća Gračanica: Ove godine nema općinskih priznanja., bit će dodijeljeno samo priznanje "Počasni građanin"

Na redovnoj sjednici Općinskog vijeća, održanoj 31. 6. 2007. godine najviše se raspravljalo o ovogodišnjim općinskim priznanjima. Višečasovna žučna rasprava koja je imala krajnji rezultat "nedodjeljivanje" tih priznanja na proslavi Dana općine, još jednom je pokazala neodrživost i apsurdnost takvog načina predlaganja i nagrađivanja, koji u osnovi vuče korijene iz nekog, već davno prevaziđenih sistema. Nažalost, rasprava nije rezultirala ni zaključkom da se u tom pogledu nešto mijenja, tako da se i iduće godine, "ko preživi", može očekivati slična "komendija". Stvar je, ipak, makar malo "spasio" predsjedavajući Općinskog vijeća, čiji je prijedlog da se priznanje počasnog građanina, kako je i Komisija predložila, dodijeli gradonačelniku bratskog grada Florja iz Francuske – "prošao" bez primjedbi.

Ostale tačke dnevnog reda Vijeće je korektno "odradilo". Usvajalo je: Odluku o vršenju komunalnih djelatnosti i komunalnom redu (o kojoj je obavljena javna rasprava), Odluku o pristupanju izradi Regulacionog plana "Radna zona I, II i III" Gračanica. Odluku o visini takse za priključak na vodovodnu i kanalizacionu mrežu i Odluku o obavezi uklanjanja i uništavanja ambrozije na području općine Gračanica, zatim Izvještaj o radu Općinskog suda u Gračanici za 2006. godinu, Izvještaj o radu i finansijskom poslovanju JP "Vodovod i kanalizacija" i JP "Komus" Gračanica za 2006. godinu.

1. 6. 2007.

Općina Gračanica dobila certifikat BAS EN ISO 9001:2000 prema kojem ispunjeva zahtjeve kvaliteta pomenutog standarda.

Odgovarajući stručni tim certifikacijske kuće TÜV THURINGEN ocijenio je da se Opći-

ni Gračanica može izdati certifikat za “Pružanje usluga u javnoj upravi i lokalnoj samoupravi”. Prethodno je izvršena provjera usklađenosti rada organa općinske uprave sa usvojenom dokumentacijom sistema upravljanja kvalitetom i standardom BAS EN ISO 9001:2000. U naredne dvije godine navedena certifikacijska kuća vršit će provjere provođenja tog sistema. Čitav ovaj posao zajednički su finansirali Općina Gračanica i švicarska Agencija za razvoj i saradnju u okviru projekta MDP.

1. 6. 2007.

Dan općine: Promocija 23. broja “Gračaničkog glasnika” - u znaku obilježavanja 35 godina saradnje i 10. godišnjice potpisivanja povelje o bratimljenju između općine Gračanica i francuskog grada Fleury les Aubrais, čija je delegacija prisustvovala promociji

Između ostalih tekstova, u ovom broju objavljen je poseban prilog o Fleury les Aubrais i rezultatima dugogodišnje saradnje tog grada sa Gračanicom. Naglašena je velika zasluga gospodina Dine Čolića, koji je sa suprugom Lilian od samog

početka gradio mostove te saradnje. Objavljena je i kraća biografija Pierre Bauchet koji je inicirao bratimljenje Gračanice i Fleury les Aubrais prije 10 godina.

1. 6. 2007.

Dan općine: Gračanica i Flori – 35 godina saradnje, 10 godina bratimljenja

U prisustvu brojnih građana i višečlane delegacije francuskog grada Floria, u foajeu Bosanskog kulturnog centra otvorena je izložba fotografija “Gračanica i Flori – 35 godina saradnje, 10 godina povelje o bratimljenju”, na kojoj je predstavljena i Likovna mapa akademskog slikara Nijaza Omerovića “Gračanica u grafici”. Izložbu je otvorio načelnik općine Gračanica Nusret Helić koji je između ostalog rekao “Nekoliko desetaka fotografija koje smo odabrali za ovu izložbu ilustruje samo mali djelić velike priče o prijateljskoj i bratskoj saradnji, geografski udaljena, a tako bliska dva grada. Kao što pokazuju prve fotografije na ovoj izložbi, sve je počelo još daleke 1973.godine. Rukometaši su bili prvi ambasadori, a Dino i Lilijan Čolić prvi graditelji mostova



Dva vatrogasna vozila: vrijedna donacija francuskih prijatelja iz Florija

prijateljstva Florija i Gračanice, Bosne i Francuske. (...)U želji da uz ove dokumente i fotografije na simboličan način, kroz likovni izraz iskažemo i dušu našeg grada večeras na neki način promoviramo i likovnu mapu, odnosno likovnu postavku našeg akademskog slikara Nijaza Omerovića, pod naslovom "Gračanica u grafici". Riječ je o specifičnom likovnom izrazu i iskazu stare, tradicionalne gračaničke čaršije i njenih tradicionalnih neprolaznih vrijednosti iz nekih ranijih vremena, koje možemo i želimo afirmirati i pokazati svijetu. Tu se negdje i susreću ove dvije, samo na prvi pogled, možda, nesaglasne izložbene postavke i njihova jedinstvena poruka sa ovog mjesta i ovim povodom: Naša iskrena želja da pokažemo ono najbolje u nama i pružena ruka prijateljima širom Evrope i svijeta.

U večernjim satima u centru grada građani su mogli uživati u muzičkom koncertu, kao i u tradicionalnom vatrometu..

2. 6. 2007.

Dan općine: Svečana akademija

Svečanoj akademiji prisustvovali su Jean Christoph Thibao – zamjenik ambasadora Republike Francuske u BiH, Miroslav Puvačić – Konzul Hrvatske u BiH, Pierre Bauchet – gradonačelnik Fleury les Aubrais-a, Clodine Bay – predsjednica asocijacije "Veza sa svijetom", Franc Haydolt – predstavnik austrijske firme "Seegen", Timur Numić – savjetnik federalnog premijera Nedžada Brankovića, Nikola Kovač – bivši ambasador BiH u Francuskoj, predstavnici Vlade TK, predstavnici susjednih općina i drugi brojni zvaničnici. Pozdravljajući prisutne, u svom govoru, Općinski načelnik Nusret Helić, između ostalog je naglasio: "Ovo je dan u kojem mi Gračanlije želimo da pokažemo što smo to uradili, u čemu smo se ponovili, s čime se možemo pohvaliti pred svijetom, pred našim prijateljima, građanima. Kao načelnik općine sa zadovoljstvom mogu reći da Gračanica bilježi stalnu uzlaznu putanju društveno-ekonomskog i sveukupnog razvoja. Neki kažu, brže od ostalih u našem užem i širem okruženju. Rezultat je to našeg poduzetničkog duha, kreativnog rada, dobre organizacije, uspostavljenih partnerskih odnosa između nosilaca privrednih aktivnosti, odnosno biznisa i lokalnih orga-

na vlasti, naše tradicije i valjda nekog posebnog mentaliteta nas Gračanlija..."

Na svečanoj akademiji prisutnima se obratio i zamjenik ambasadora Francuske u BiH Jean Christoph Thibao, istakavši da je saradnja između Gračanice i Fleury-a počela još prije 10 godina i to zahvaljujući Dini Čoliću, te da ambasada Francuske u BiH ohrabruje i druge gradove u Bosni i Hercegovini na ovakav vid saradnje, kao što ga ima Gračanica sa Florijem.

U kulturno-umjetničkom dijelu Akademije sa svojim izvedbama nastupili su Zoran Imširović-pijanista, vokalni ansambl "Arabeske" i učenici Osnovne paralelne muzičke škole Gračanica.

2. 6. 2007.

Dan općine: Gradonačelniku Fleury les Aubrais-a Pierre Bauchet - počasni građanin Gračanice

To najviše općinsko priznanje Pierre Bauchet (Buše-u) uručeno je na svečanoj akademiji povodom Dana općine Gračanica. Dodijeljeno mu je Odlukom Općinskog vijeća Gračanica od 31. 5. 2007. godine. Priznanje je uručio Općinski načelnik Nusret Helić.

2. 6. 2007.

Dan općine: Visoko priznanje "Zlatna medalja Senata Francuske" Dini Čoliću iz Gračanice

...uručio je gradonačelnik Fleury les Aubrais-a Pierre Bauchet na Svečanoj akademiji povodom Dana općine Gračanica. Istovremeno mu je, u ime općine Gračanica, uručena i Zahvalnica za doprinos u oblasti međunarodne saradnje.

2. 6. 2007.

Dan općine: puštena u saobraćaj rekonstruisana ulica Riječka

Svečanim presijecanjem vrpce, Općinski načelnik Nusret Helić i predsjednik Mjesne zajednice Gračanica Sead Čaušević pustili su u saobraćaj rekonstruisanu i asfaltiranu ulicu Riječka u Gračanici u koju je uloženo oko 140 hiljada KM. U ovoj ulici riješeno je i pitanje parkiranja za 86 vozila. Sredstva su obezbijeđena iz dijela Budžeta općine za rekonstrukciju putne mreže na području općine Gračanica.



Proizvodni pogoni Širbegović grupe

2. 6. 2007.

Dan općine: kamen temeljac za Eko-toplanu u Gračanici

Nakon izvršenih svih potrebnih priprema, svečanim polaganjem kamena temeljca, označen je početak realizacije jednog od najvećih komunalnih projekata od kada Gračanica postoji. Kamen temeljac u Sprečkom polju položili su Općinski načelnik Nusret Helić, savjetnik federalnog premijera Timur Numić i predstavnik, nosioca investicije, firme Seeges iz Salzburga Franc Haydolph.

Pored općinskog načelnika i predstavnika firme Seeges, na ovoj svečanosti, u ime premijera Vlade Federacije Bosne i Hercegovine, skupu se obratio i savjetnik u Vladi, gospodin Timur Numić, koji je prenio podršku premijera Vlade Nedžada Brankovića, sa željom da čitava Bosna i Hercegovina bude kao Gračanica.

Da podsjetimo: Čitav ovaj posao povjeren je firmi "Seegen" iz Austrije, koja ima značajna iskustva u projektovanju i implementaciji programa

toplifikacije manjih gradova u Austriji. Urađena je Studija za snabdijevanje grada Gračanice toplotnom energijom i prihvaćena na sjednici Općinskog vijeća, 01. 02. 2005. godine, kao osnova za programiranje dalje aktivnosti na realizaciji ovog velikog projekta.

Studija je pokazala da je za Gračanicu najpovoljniji izvor toplotne energije toplana sa energijom koja se dobija kombinacijom sljedećih izvora: bio masa + geotermija.

Na osnovu studije, urađen je Projekat toplifikacije Gračanice i izvršene su složene pripreme, administrativno-tehničke i finansijske za početak njegove realizacije. Inostrani partneri formirali su firmu u Gračanici, koja će biti nosilac čitavog ovog posla, obezbijedili lokaciju i druge predušlove za rad firme. Zaokružena je konstrukcija finansiranja projekta u ukupnom iznosu od 15 miliona KM, od čega 10 miliona obezbjeđuje partner iz Austrije, dok 5 miliona čine nepovratna sredstva iz domaćih i stranih ekoloških fondova. Budući da se radi o prvom projektu te vrste u BiH, projekat toplifikacije u Gračanici na naj-

konkretniji način, sa milion KM, podržala je Vlada TK, a čvrste garancije podrške dala je i Vlada F BiH. Međutim, ključni faktor za realizaciju projekta bila je podrška građana, a posebno privrede, koja je ovih dana došla do punog izražaja, reako je na svečanosti polaganja kamena temeljca načelnik općine Nusret Helić, sa porukom: "Projektom toplifikacije osigurat ćemo uštede u gorivu, dakle jeftinije grijanje, poboljšanje ekoloških uslova života u gradu, smanjenje investicionih troškova kod nove izgradnje stanova (ukidanje kotlovnica, prostora za gorivo, dimnjaka) i otvoriti mogućnost širenja toplovođa u skladu sa budućim razvojem grada. Zato želim da poručim građanima Gračanice: s punim povjerenjem u sebe i one koji stoje iza ovog projekta, stavite svoj potpis na ponuđene ugovore i zakoračite u bolju budućnost Gračanice."

10. 6. 2006.

Asfalt u Donjoj Lohinji

Predate su na upotrebu dvije lokalne saobraćajnice: Bajrići – Šestani u dužini od 400 i put u mahali Ahmetaši u dužini od 700 metara. Uloženo je preko 100.000 KM od čega su mještani obezbijedili 20%.

10. 6. 2007.

"Širbegović grupa": veliki posao Banja Luci

Nakon potpisanog ugovora, počela gradnja objekta u Banja Luci za uglednog investitora "Pecvec" iz Hrvatske. Riječ je o ugovoru vrijednom preko 5 miliona eura.

10. 6. 2007.

"Eurogalant" planira proširenje proizvodnih pogona

Za izgradnju nove proizvodne hale već je rezervisano i kupljeno zemljište površine 5.000 kvadratnih metara koje se naslanja na sadašnji krug ove firme.

22. 6. 2007.

"Širbegović grupa" dobitnik još jednog prestižnog priznanja: "Regionalni biznis partner 2007."

Već 12 godina za redom ovo priznanje dodjeljuje beogradska firma "Mass Media Internatio-

nal", u kategoriji "regionalni biznis partner", koja je namijenjena najboljim kompanijama u regionu. Odluka o dodjeli ovog priznanja "Širbegović grupi" donesena je nakon stručne analize poslovanja velikog broja kompanija i institucija različitih djelatnosti, kao i na osnovu prijedloga poslovnih partnera, rezultata nezavisnih istraživanja tržišta i finalne ocjene članova komisije ovogodišnje akcije "Biznis partner". U obrazloženju nagrade, između ostalog, piše: "Na svom putu uspeha kompanija "Širbegović" je promovisala visoke profesionalne i etičke standarde ponašanja postizujući izuzetan kvalitet svojih usluga."

24. 6. 2007.

Konačno – asfaltom preko Monja, svečanost u Džakulama

Radi se o izuzetno zahtjevnoj dionici puta u dužini od oko 4.000 metara u koju je u prošloj i ovoj godini uloženo oko milion KM, sredstava iz budžeta općine, namijenjenih za rekonstrukciju i asfaltiranje lokalne putne mreže, iz kantonalnog budžeta i dobrovoljnih priloga mještana. Ovom saobraćajnicom sa centrom općine konačno su povezane mjesne zajednice i naselja: Prijeko Brdo, Trnovci, Buk, Dažakule i Gornji Dobrovci. Otvarajući ovu saobraćajnicu, općinski načelnik Nusret Helić je najavio još jedan veliki projekat - "Četovulja", Buduća privredno-turistička destinacija općine Gračanica.

24. 6. 2007.

U organizaciji gračaničkog Crvenog krsta (križa) organizovan susret dobrovoljnih davalaca krvi iz Gračanice, Teočaka,, Gradačca, Srebrenika, Lukavca i Tuzle

Okupilo se preko stotinu veterana koji su krv dali više desetina puta. Samo iz Gračanice 32 su dali krv više od 50 puta. Svima su dodijeljena prigodna priznanja Crvenog krsta, a načelnik općine Gračanica im je uputio riječi zahvalnosti i divljenja u ime svih onih kojima je njihova krv spasila život ili vratila zdravlje, te izrazio nadu da će ovi humanisti imati bolji i dostojniji tretman u našem društvu.

1. 7. 2007.

Nakon 15 godina proradile "Terme Ozren" u Kakmužu

Radi se velikom prirodnom resursu za razvoj zdravstveno-rekreacionog turizma i eksploataciju plina ugljendioksida, kojeg je općina Gračanica vlastitim sredstvima počela razvijati od 1985. godine, s lijeve strane Spreče, između Kakmuža i Sočkovca, kao zdravstveno-rekreacioni centar regionalnog značaja. Do početka rata izgrađen je olimpijski i dječji bazen, te kade sa termomineralnom vodom i ostalim pratećim sadržajima (parkinzi, kapije, ugostiteljski objekti), a započeta je i eksploatacija plina. Tokom rata ti su objekti zapušteni i devastirani, a nakon povlačenja dejtonske linije ostali u srpskom entitetu. Trebalo je da prođe 15 godina da budu ponovno stavljeni u funkciju. U međuvremenu, s desne strane Spreče, na području gračaničkog Šenika aktivirane su bušotine termomineralne vode, napravljeni novi bazeni, koji se koriste već nekoliko godina. Bez obzira na to, novi vlasnici starih termalnih bazena u Kakmužu ozbiljno računaju i na klijentelu iz Gračanice.

5. 7. 2007.

Dvadeset deveta sjednica Općinskog vijeća: usvojen Nacrt odluke o građevinskom zemljištu

...kojom je definisan način dodjele neizgrađenog gradskog građevinskog zemljišta u državnom vlasništvu za izgradnju porodičnih stambenih objekata i dodjela gradskog građevinskog zemljišta na korištenje fizičkim i pravnim licima za izgradnju ostalih objekata. Određen je način obračuna naknade za pogodnost gradskog građevinskog zemljišta (renta) i naknade za uređenje gradskog građevinskog zemljišta u slučajevima izgradnje novog objekta na mjestu starog koji je srušen ili će se rušiti, a za koji je postojalo odobrenje za građenje. Također, je predviđen i način plaćanja ovih naknada na rate prema posebno sačinjenom ugovoru. U skladu sa Zakonom gradsko građevinsko zemljište dijeli se na 6 gradskih zona. U odnosu na prethodnu, ovom Odlukom je proširen obuhvat gradskog građevinskog zemljišta sa zemljištem koje se nalazi u obuhvatu Regulaionog plana "Radne zone I, II, i III", a za koje će se Odluka primjenjivati nakon usvajanja tog regulacionog plana. Nacrt odluke bit će na javnoj raspravi 45 dana.

Između ostalog, na ovoj sjednici Vijeće je uo-

voljilo zahtjevu MDD "Merhamet" i usvojilo Odluku o davanju prostora stare uprave zgrade "Avisa" (na autobuskoj stanici) na korištenje za potrebe Narodne kuhinje, na period od pet godina.

23. 7. 2007.

Trideseta sjednica Općinskog vijeća: Usvojeno urbanističko rješenje lokacije bivše robne kuće, uskoro u centru Gračanice atraktivni sadržaji na prostoru bivše robne kuće

Da podsjetimo, nakon višegodišnjih rasprava i vrlo oprečnih mišljenja među građanima, u stručnoj javnosti, a i u krugovima oko investitora - gračaničke "Bosne", projektantima je zadato sljedeće: u skladu sa ukupnim lokacionim i prostornim potencijalom, razvojnim perspektivama i ciljevima, prostorna cjelina nekadašnje robne kuće mora imati karakter atraktivnog područja, kao dio centralne zone Gračanice, sa sadržajima i intenzitetom djelatnosti od općeg značaja. U najvećoj mjeri taj je prostor namijenjen profitabilnim komercijalnim pratećim sadržajima koji treba da podstaknu obimnije korištenje prostora za različite vidove u urbanoj sredini. Uz sve to, treba stvoriti uslove da se ovaj prostor koristi i za okupljanje građana, za održavanja kulturnih manifestacija na formiranom trgu itd.

Prostor je planiran kao stambeno-poslovni kompleks sa stanovanjem na višim etažama, dok je manji trg planiran za kulturno-zabavne manifestacije. Predviđena kvadratura građevine je 5.667,12 m². U suterenu će biti smješten parking prostor (garaža) površine 1.809,88 m² – 31 parking mjesto. U prizemlju će se nalaziti lokali sa kvadraturom 40-100 m², a na uglu uz pješačku ulicu je planiran kafe-bar koji bi imao pogled na vodenu površinu, odnosno fontanu. Na spratu, uz glavnu gračaničku ulicu bit će lokali, dok su u drugom dijelu kancelarijski prostori. Prema Keju planiran je restoran sa pogledom na rijeku Sokolušu. Objekat je projektovan tako da ima dobru komunikaciju sa prizemljem, pješačkom zonom, ulicom Džemala Bijedića kao i Pekarskim prolazom. Zbog otvorenih komunikacija i lakšeg korištenja prostora, u objektu su predviđeni pasaži, a ukupna površina poslovnog prostora je 2.403,9 m². Kvadratura stambenog prostora iznositi će 1.340,2 m², sa prosječnom kvadraturom stano-

va od 60 - 80m². Objekat je sastavljen iz tri cjeline kao poluotvoreni blok i izlazi na ulice koje ga okružuju, a sastoje se iz suterena, prizemlja, dva sprata i mansarde.

U pogledu oblikovanja fasada moguće je odstupanje od idejnog rješenja. Fasada mora biti usklađena sa okolnim objektima i ne smiju narušiti koncept urbanističkog projekta.

Na osnovu ovih rješenja, za očekivati je da će gračanička čaršija napokon dobiti objekat koji će odgovarati njenom ambijentu i potrebama.

21. 7. 2007.

U Malešićima predato na upotrebu potpuno uređeno i asfaltirano igralište za male sportove, a potom otvoren tradicionalni malonogometni memorijalni turnir "Memić – Kalesić"

Simboličnim presijecanjem vrpce, zajedno sa općinskim načelnikom Nusretom Helićem, igralište su otvorili Kemal Hamzić direktor firme "Klaus Lehman" i Mujo Hasić, direktor firme "Variplast", kao najveći donatori i učesnici u finansiranju ovog projekta. Radi se o investiciji od oko 100.000 KM koja je finansijski obezbijeđena sredstvima mjesne zajednice, općine i iz donacija nekoliko privrednih subjekata i pojedinaca sa općine.

25. 7. 2007.

"Širbegović grupa": U zadnjoj sedmici jula puštena je u rad nova savremena betonara "Simem" u proizvodnim pogonima Širbegović grupe.

Riječ je o investiciji vrijednoj oko milion i dvjesto hiljada Eura. Kapacitet nove betonare je 80 kubika betona po satu. Ciklus traje 90 sekundi od ubacivanja frakcija, miješanja do pražnjenja betonare. Cijeli proces proizvodnje betona upravlja se kompjuterski, što obezbjeđuje veću produktivnost i bolji kvalitet betona. Nabavka nove betonare dio je ukupne strategije firme da prati i u radu primjenjuje najsavremenija tehnološka dostignuća.

U okviru tekućeg investicionog programa "Širbegović grupe" u ovom periodu izgrađena su još dva nova proizvodna objekta i deponija, na oko 10.000 kvadratnih metara. Radi se, dakle, o

znatnom proširenju proizvodnih pogona koji su sada smješteni na 150 000 m². Većina proširenja se odnosi na kapacitete za proizvodnju čeličnih konstrukcija, koji u protekloj godini bilježi najveći razvoj.

27. 7. 2007.

Gračanica: otkriveno novo spomen-obilježje Ademu Aliću i održana Tribina "Poznati antifašisti Gračanice"

U okviru obilježavanja 27. jula, Dana ustanaka Bosne i Hercegovine protiv fašizma u Drugom svjetskom ratu, a u organizaciji Općinskog odbora UBNOAR-a Gračanica, na groblju Režići, otkrivena nova spomen-ploča na mezaru čuvenog gračaničkog antifašiste Adema Alića, kojeg su Nijemci strijeljali 18. 12. 1943. godine. Nakon toga organizovana javna tribina "Poznati antifašisti Gračanice", na kojoj je o likovima Adema Alića, Ahmeta Šiljića i Damjana Blagojevića govorio mr. historije Omer Hamzić.

27. 7. 2007.

Džakule: asfaltirana dionica puta kroz Mehmedoviće

... i most na putu koji tu mjesnu zajednicu spaja sa susjednim Biberovim Poljem, koje pripada općini Gradačac. Radovi su koštali oko 30.000 KM. Sredstva su obezbijedili mještani i općina Gračanica po principu "pola-pola".

3. 8. 2007.

Spomen-obilježje u Džakulama

U okviru Programa obilježavanja 13. godišnjice bitke na Visu, u Džakulama je otkriveno spomen obilježje šehidima i poginulim borcima u ratu za Bosnu i Hercegovinu (1992.- 1995.) s područja sadašnjih mjesnih zajednica Džakule, Trnovci i Buk. Tom su činu prisustvovali članovi porodica šehida i poginulih boraca, te brojni gostiju iz općine kao i predstavnici boračkih organizacija i udruženja. Na spomen-ploči ispisano je 13 imena poginulih boraca i 5 imena civilnih žrtava rata. Borci: Musić Izet, nosilac priznanja "Zlatni ljiljan" (1962. – 1994.), Bajrić Vehid (1970. – 1992.), Halilović Nedžad (1967. – 1993.), Halilović Ramiz (1964. – 1995.), Halilović Amir (1972. – 1992.), Habibović Habib (1949. – 1992.), Hod-



Obnovljeno spomen-obilježje Ademu Aliću na greblju Režići

žić N. Mustafa (1953. – 1994.), Hotić Mehmed (1965. – 1993.), Jukić Jasmin (1971. – 1993.), Nuhanić Rašid (1972. – 1993.), Okanović Mustafa (1974. – 1993.), Selimović Hasan (1966. – 1993.), Šerbečić Ševalija (1939. – 1994.); Civilne žrtve: Habibović Senad (1972. – 1996.), Hevešević Ševalija (1975. – 1995.), Ibričić Hava (1971. – 1994.), Muratović Hava (1975. – 1995.), Mušić fatima (1948. – 1993.).

3. 7. 2007.

Projekti povratka: 11 kuća za srpske povratnike u Gornju Lohinju i Skipovac

U Kabinetu Općinskog načelnika, uz skromnu svečanost, potpisani su ugovori za izgradnju 11 kuća srpskih povratnika na prostor Gornje Lohinje (8 povratnika) i po jedan iz Donje Lohinje, Lendića i Donjeg Skipovca. Sredstva za izgradnju tih objekata obezbjeđuje državno Ministarstvo za ljudska prava, preko posebnog fonda za izbjeglice.

5. 7. 2007.

Konačno – asfaltom preko Monja, svečanost u Doborovcima

U prisustvu brojnih građana i gostiju i uz pri-

godan kulturno-umjetnički program, koji su izveli članovi Društva "Preporod" Doboj Istok, svečano je obilježen završetak radova na dionici puta Doborovci (centar) – Monj, koji spaja Džakule i prijeko Brdo sa Gračanicom u dužini od 1.800 metara. Na skupu je govorio predsjednik mjesne zajednice Doborovci Rukib Džananović, naglasivši da je u izgradnju puta uloženo oko 350.000 KM, a sredstva su obezbijedili: općina Gračanica 195.000 KM, TK 35.000 KM i mještani Doborovaca 120.000 KM. Aktuelni projekti u toj mjesnoj zajednici su: rekonstrukcija vodovoda u centru sela i mahali Serhatlije, kao i asfaltiranje priključnih puteva unutar sela. Čestitke mjesnoj zajednici i mještanima Doborovaca u svojim kraćim obraćanjima uputili su predsjedavajući Općinskog vijeća Hasan Fehratović i općinski načelnik Nusret Helić, koji je zajedno sa predsjednikom Građevinskog odbora Mustafom Okanovićem, simboličnim presijecanjem vrpce, zvanično pustio u promet tu saobraćajnicu.

7. 8. 2007.

U sklopu programa obilježavanja 13. godišnjice Bitke na Visu, u Gračanici prof. Edin Šaković predstavio svoj istraživački projekat "Bitka na

Visu – usmena historija”.

U osnovi radi se o jednom sasvim novom pristupu u našoj historiografiji, odnosno o prikupljanju usmenih svjedočanstava neposrednih učesnika bitke na Visu, primjenom metode usmene historije, te njihovoj obradi i arhiviranju, kao i odabir i publiciranje u vidu posebne monografije. Ta kazivanja, kako je projektom predviđeno, činit će tri četvrtine publikacije, dok će jednu četvrtinu sadržavati stručno-historiografski tekstovi i iskazi ratnih komandanata, čije su jedinice učestvovala u bici na Visu. Projekat bi trebalo da se realizuje u naredne dvije godine uz punu podršku općine, boračkih organizacija, komandanata ratnih jedinica koje su učestvovala u bici na Visu, te odgovarajućih stručnih institucija i organizacija.

10. 8. 2007.

“Širbegović grupa”: veliki posao u Kragujevcu

Kao rezultat uspješne saradnje sa poznatom firmom “Meraktor”, potpisan novi ugovor za gradnju trgovačkog centra te renomirane firme u Kragujevcu. Vrijednost ugovora 3 miliona eura.

26. 8. 2007.

Nakon postavljanja ulične rasvjete, u gračaničkom prigradskom naselju Hajdarovac asfaltirano je 6 manjih ulica u ukupnoj dužini od 1.800 metara.

Kako je na svečanosti povodom simboličnog otvaranja tih saobraćajnica, u ime građevinskog odbora rekao Fahrudin Kurtović, u ovu investiciju uloženo je 230.000 KM, od čega su sami građani prikupili 40.000 KM. U pomoć je priskočilo i desetak gračaničkih firmi, kojima su urečene pismene zahvalnice i priznanja. U svojim prigodnim obraćanjima čestitke građanima Hajdarovca uputili su i načelnik općine Nusret Helić i predsjedavajući Općinskog vijeća Gračanica Hasan Fehratović.

2. 9. 2007.

Asfaltirana ulica u Pribavi

... koja vodi prema nogometnom igralištu. U rekonstrukciju i asfaltiranje te saobraćajnice, dužne 545 i širine 4 metra, uloženo je 60.000 KM, od čega su mještani obezbijedili 20, a Općina 80%.

11. - 17. 9. 2007.

Obilježavanje 35. godišnjice saradnje i desete godišnjice potpisivanja povelje o bratimljenju: Gračanlije u Fleury Les Aubrais – kao kod svoje kuće (O boravku delegacije Gračanice u Floriju od 11. do 17. 9. 2007. godine)

Obilježavanje tih godišnjica, započeto 2. juna ove godine, koje se odvijalo u sklopu obilježavanja Dana općine Gračanica, nastavljeno je u Fleury Les Aubrais, od 11. do 17. 9. 2007. godine. Oficijelnu delegaciju Općine Gračanica koja je tim povodom boravila u Fleury Les Aubrais predvodio je Općinski načelnik Nusret Helić. U kulturno-umjetničkim programima i manifestacijama koje su tim povodom organizovane na više mjesta u Fleury Les Aubrais učestvovala je odabrana ekipa KUD “Adem Alić”, folklorni i muzički sastavi, solisti zabavne muzike, te plesni ansambl “Plamingo”. Posebnu pažnju posjetilaca tih priredbi izazvala je izložba ručnih radova koju je priredilo Udruženje “Gračaničko keranje”.

Ovu manifestaciju uveličala je i delegacija Formie, bratskog grada iz Italije, koja je takođe došla pojačana sa izvrsnom pozorišnom i folklornom družinom.

Kao i uvijek do sada, domaćini na čelu sa gradonačelnikom Pjerom Bušecom, pokazali su izuzetno gostoprimstvo i potrudili se da program boravka gračaničke ekipe u Fleury Les Aubrais obogate mnogim zanimljivim sadržajima, posjetama, kulturno zabavnim programima, itd. Izdvajamo samo neke detalje: posjeta fabrici ženskog rublja “Sokolar”, obilazak znamenitosti Pariza i Orleana, posjeta Mješovitoj srednjoj školi u Floriju itd.

U subotu, 15. 9. 2007. godine, nakon obilaska Vatrogasne brigade u Fleury Les Aubrais, gdje je smješten i regionalni centar protivpožarne zaštite za Orlean, koji raspolaže sa najsavremenijom opremom za brze intervencije u slučaju požara i drugih iznenadnih havarija i katastrofa, domaćini su priredili svečano uručivanje dva vatrogasna vozila sa opremom Vatrogasnoj jedinici u Gračanici. Ceremoniji simboličnog uručivanja ključeva tih vozila prisustvovala je i ambasadorica Bosne i Hercegovine u Parizu, gospođa Željana Zovko. Nakon ceremonije dodjele ključeva, vozila su već otpremljena vozom za Gračanicu.

Centralni događaj posvećen obilježavanju desete godišnjice bratimljenja Gračanice i Fleury Les Aubrais bio je nastup našeg folklornog i muzičkog ansambla, te plesne grupe i solista u prepunoj sali reprezentativnog centra za kulturu "La pasarela" u Fleury Les Aubrais, u subotu naveče, 15. 9. 2007. godine, nakon kojeg je organizovano druženje sa domaćinima do kasno u noć.

Prije početka priredbe, u znak priznanja i zahvalnosti za sve što su učinili na unapređenju bratske saradnje između Fleury Les Aubrais i Gračanice, gradonačelnik Florija Pjer Buše, na svečan način i uz birane riječi, uručio je priznanje "Počasni građanin Fleury Les Aubrais" načelniku Općine Nusretu Heliću i Gračanliji Dini Čoliću, koji je već poznat kao ambasador prijateljstva između Francuske i Bosne i Hercegovine.

Nakon uručjenja tih priznanja, priredba je otvorena kratkim dokumentarnim filmom o Gračanici koji je titlovan na francuski jezik, a potom su izvedene po tri koreografije našeg folklornog i plesnog sastava "Plamingo", te nekoliko solo zabavnih melodija. U programu su učestvovali i članovi pozorišne grupe iz Formije, sa jednom kraćom plesno-muzičkom izvedbom u stilu starinske talijnske komedije del arte.

U istom ambijentu priređena je foto-izložba, posvećena desetoj godišnjici bratimljenja Fleury Les Aubrais i Gračanice i izložba "Gračaničkog keranja", koja je, inače, izazvala veliko interesovanje posjetilaca, što se pokazalo u sutradan na nedjeljnoj pijaci u Floriju, gdje je, zahvaljujući domaćinima, "radio" i štand "Gračaničkog keranja".

Pored manifestacionog dijela, u okviru ove posjete obavljani su i oficijelni razgovori o vidovima i oblicima buduće saradnje u između Fleury Les Aubrais i Gračanice, posebno oko implementacije već odobrene donacije za most prijateljstva u Gračanici. Riječ je bilo i o pripremama za organizovanje već tradicionalnih sportskih susreta prijateljstva četiri bratska grada: Fleury Les Aubrais (Francuska), Formia (Italija), Haninge (Švedska) i Gračanica (BiH), čiji je domaćin Gračanica, početkom maja iduće godine. Utvrđeni su osnovni detalji programa tih susreta, kao i oblici finansijske pomoći Općini Gračanica oko organizovanja tih susreta.

7. 9. 2007.

Drugi festival kratkog filma u Gračanici

U prepunoj Sali Bosanskog kulturnog centra u Gračanici počeo je Drugi festival kratkog filma, koji organizuje gračanička firma "IT Computers" u saradnji sa Udruženjem filmskih radnika BiH, Općinom Gračanica i Bosanskim kulturnim centrom. U svom pozdravnom govoru, tokom ceremonije otvaranja festivala, načelnik općine Gračanica Nusret Helić, pohvalio je firmu "IT Computers", koja istrajava u svojoj namjeri da utemelji ovaj festival u Gračanici i obećao pomoć općine da se ova značajna kulturna manifestacija održi i unaprijedi. Nakon otvaranja, prvog dana Festivala, prikazano je 10 filmova domaćih autora, dok je drugog dana festivala bila na programu retrospektiva animiranog filma pod nazivom "Retro Balkanima", tokom koje je predstavljeno 12 filmova iz više država regiona.

10. 9. 2007.

Donji Skipovac: stvaraju se uslovi za povratak prijeratnog srpskog stanovništva

Nakon što su timovi za deminiranje Federalne i Kantonalne uprave Civilne zaštite, u maju ove godine završili dominiranje terena u Donjem Skipovcu, tačnije u zaseocima Brđani i Kojići, ukupne površine 4.591 kvadratni metar, stvoreni su prvi preduslovi za povratak prijeratnog srpskog stanovništva na ovo područje.

Uslov finansijera, Svjetskog luteranskog saveza, za realizaciju izgradnje 14 stambenih objekata, bio je da se raščiste ruševine devastiranih stambenih objekata. Na projektu raščišćavanja, štab Civilne zaštite Općine Gračanica kandidovao je Federalnu upravu Civilne zaštite, tim PLANT. Mještani navedenih zaseoka veoma su zadovoljni, jer je ovo prvi konkretan projekat koji je urađen na ovom području kada je u pitanju povratak.

Općina Gračanica u potpunosti podržava sve projekte koji omogućavaju i podstiču povratak prijeratnog stanovništva na svoja ognjišta, na što upućuju i potpisani ugovori za izgradnju i obnovu kuća za 11 srpskih povratnika, koje preko Općine Gračanica provodi državno Ministarstvo raseljenih osoba i izbjeglica.

27. 9. 2007.

**Trideset prva sjednica Općinskog vijeća:
izvršenje budžeta za prvo polugodište i
izvještaj o izgradnji putne infrastrukture iz
zaduženja općine**

Budžet za 2007. godinu projektovan je u visini od 11.935.000 KM, od čega su porezni prihodi 6.437.000 KM, neporezni prihodi 1.766.000 KM, tekuće potpore (grantovi) 1.270.000 KM i primici - zaduženja za putnu infrastrukturu 2.722.743 KM. Za prvih šest mjeseci u 2007. godini ostvareni su prihodi i primici u iznosu od 5.935,380 KM i rashodi i izdaci u iznosu od 4.772,743 KM. Višak prihoda nad rashodima ostvaren je u iznosu od 1.162.637 KM.

Visina ukupno ostvarenih prihoda bez primitaka (990.062 KM) u prvom polugodištu 2007. godine iznosi 4.945.318 KM, što je 4,41% više od planiranih prihoda, a 42,41% više u odnosu na prošlu godinu. U strukturi budžetskih prihoda najveći dio čine porezni prihodi u iznosu od 3.584.931 KM ili 72,49% ukupnih prihoda, što je za 11,39% više u odnosu na plan. Neporezni prihodi ostvareni su u iznosu od 895.374 KM ili 18,11% ukupnih prihoda, odnosno 1,40% više u odnosu na plan. Tekuće potpore ostvarene su u iznosu od 465.013 KM što čini 9,40% ukupnih prihoda. Radi se, uglavnom, o sredstvima za toplifikaciju od Vlade Tuzlanskog kantona i sredstvima za obnovu stare džamije u Sokolu od Vlade Federacije.

Na prihodovnoj strani Budžeta bilježi se porast poreskih prihoda: na plate, na promet nepokretnosti, na promet po propisima do 31. decembra 2005. godine i blagi porast prihoda po osnovu PDV-a.

Što se tiče budžetske potrošnje u prvom polugodištu, ona je iznosila 3.543.531 KM (ili 74,24% od ukupnih rashoda), što je za 18,85% manje u odnosu na plan. Visina izvršenih izdataka iznosi 1.229.212 KM (ili 25,76% od ukupnih rashoda), što je za 23,22 % manje od planiranog.

Ostvareni suficit u iznosu od 1.162.632 KM nastao je zbog neravnomjerne dinamike ili nerealizovanih projekata u prvom polugodištu, a čija je realizacija u toku ili će biti realizovani do kraja godine.

Posebnu pažnju vijećnika na ovoj sjednici iza-

zvala je Informacija o toku realizacije projekta izgradnje putne infrastrukture iz zaduženja općine u iznosu od 3,5 miliona KM, koji je započet u 2006. godini. Riječ je o jednom od najvećih infrastrukturnih projekata na općini u poslijeratnom periodu, koji se, uz podršku i učešće građana (i jednim dijelom iz budžeta), bez obzira na sve teškoće, koje obično prate takve projekte, ipak dosta uspješno realizuje. Nakon širih obrazloženja, Informacija je usvojena, uz predložene zaključke na kraju tog materijala.

Projekat je, inače, trebalo da se završi do polovine ove godine, ali će se rokovi za dovršenje nekih puteva, po svemu sudeći, morati prenijeti i u narednu godinu. Suviše su dugo trajali poslovi oko izrade predračuna i procedure provođenja tendera, a zbog žalbi je postupak zaključivanja ugovora dosta kasnio, pa analogno tome i početak radova. Zbog odustajanja jednog od izabranih izvođača, svi poslovi su ustupljeni D.O.O. "Roading"-u, što je produžilo rokove, a s obzirom da su u nekim mjesnim zajednicama mještani obezbijedili dodatna sredstva, urađeni su i neki neplanirani putevi.

Od ukupne vrijednosti ugovorenih radova, do sada je realizovan posao u vrijednosti od 4.049.813 KM, od čega iz zaduženja općine 2.830.478 KM, od građana 412.658 KM i iz ostalih izvora 806.677 KM.

Od ugovorenih poslova i puteva iz ovog projekta, do sada nisu urađeni putevi u Gračanici (Ritošići, Ul. Hazima Vikala, Hadžikadijiina, i Stubljska strana), zatim Piskavici, Prijekom Brdu, Doborovcima, Škahovici, dio u Donjoj Lohinji, dok su u toku radovi u Lukavici i Stjepan Polju, od kojih je već završen jedan dio.

U zaključku ovog izvještaja, stoji da će se dodatna sredstva za neke putne pravce na kojima radovi nisu dovršeni, u slučajevima gdje se ne radi o velikim iznosima, obezbijediti kroz rebalans budžeta za ovu ili u budžetu za narednu godinu. (Doborovci – Monj – Džakule, Trnovci, Stjepan Polje, Donja i Gornja Orahovica i Gračanica). Za nedovršene putne pravce koji povezuju mjesne zajednice sa centrom općine (Malešići i Vranovići), pokušat će se sredstva obezbijediti u budžetu za narednu godinu.

U svakom slučaju, od izvođača radova će se

zahtijevati da ugovoreni posao završi do kraja 2007. godine i da do zime sanira oštećenja nastala u garantnom roku, kao i štetu na putevima, koja je nastala prilikom sanacije i asfaltiranja drugih puteva.

Osim ove, Vijeće je usvojilo još dvije informacije: o statusu i namjeni objekata izgrađenih od strane međunarodnih organizacija za smještaj izbjeglih i raseljenih lica nakon njihovog iseljenje i o izbjegličkoj i povratničkoj populaciji na području općine Gračanica..

2. 10. 2007.

Izabrano rješenje za Centralno šehidsko spomen obilježje u Gračanici

Tokom posljednjih desetak godina više puta pokretana je inicijativa za podizanje tog spomen obilježja, razgovaralo se o idejnom rješenju, tražila najpovoljnija lokacija. Svi prijedlozi su se svodili na centralni gradski park, prostor ispred Osman-kapetanove medrese i Park žrtava genocida u Srebrenici ispred zgrade Općine. Početkom ove godine Općinsko vijeće se opredijelilo za tu treću soluciju, to jest park ispred Općine. U postupku izbora idejnog rješenja, nakon raspisanog i zaključenog konkursa, Komisija za izbor najpovoljnijeg rješenja centralnog šehidskog spomen obilježja opredijelila se za dva rješenja i oba uputila na javnu raspravu. Na osnovu prijedloga i sugestija iz javne rasprave, Komisija je konačno odabrala rješenje u vidu kamenog slavoluka od klesanog kamena koji će biti centralni dio jednog šireg spomeničkog kompleksa sa amfiteatrom za časove historije. Prema utvrđenoj dinamici, spomenik će biti izgrađen do proljeća iduće godine.

3. 10. 2007.

U ZZ "Gračanka" nezadovoljni ovogodišnjom kampanjom otkupa proizvoda

Prema rezultatima otkupa poljoprivrednih proizvoda, stručnjaci Zemljoradničke zadruge "Gračanka" ovu godinu okarakterisali su kao jednu od najslabijih u poslijeratnom periodu. Godina će biti upamćena po visokim temperaturama, sušnim periodima i velikim problemima koje su imali poljoprivredni proizvođači, koji su bili prepušteni na milost i nemilost nelojalnoj konkurenciji i nepovoljnim vremenskim prilikama.

U takvoj situaciji došlo je da smanjenja prinosa svih kultura što se negativno odrazilo na realizaciju plana otkupa u Zemljoradničkoj zadrugi "Gračanka", koji će podbaciti za 30% u odnosu na plan. Zabrinjava činjenica da se iz godine u godinu smanjuje interes za kooperantsku proizvodnju u poljoprivredi.

10. 10. 2007.

Završena rekonstrukcija dijela magistralnog puta Gračanica – Srnica na relaciji Podgaj - Malta – ulaz u Pašaliće

Rekonstrukcijom tog dijela puta i postavljanjem trotoara u dužini od oko 500 metara, prigradska naselja Malta i Pašalići definitivno su spojena sa gradom, koji je dobio puno ljepši i kvalitetniji ulaz sa sjeverne strane. Godinama je to za pješake bio najopasniji dio puta, pogotovo u večernjim satima i noću. Radove je financirala Direkcija za puteve Tuzlanskog kantona.

13. 10. 2007.

Vokalno-instrumentalni sastav "Etno art": osvježenje na muzičkoj sceni Gračanice

Koncert islamske i duhovne muzike Bosne i Hercegovine bio je najljepši bajramski poklon ovog ansambla ljubiteljima dobre muzike u Gračanici. U ansamblu nastupaju profesori muzike: Miralem Mejremić (klavirista i osnivač sastava), Anis Imširović (klavijature) i Damir Beganović (harmonika), te vokalni solisti Haris Mustajbašić i Omer Nasić. Na bajramskom koncertu izveli su odabrane ilahije i kaside, etno kompozicije i narodne napjeve u umjetničkim obradama za svoj vokalno-instrumentalni sastav koji je po svojim grupama instrumenata nestandardnog tipa: klavir, harmonika, klavijature, udaraljke, semplovana duvačka i gudačka sekcija. Cilj ansambla je da njeguje tradicionalnu muzičku kulturu, etno muziku uopće i kulturnu baštinu našeg podneblja.

22. 10. 2007.

Početak gradnje nove poslovne zone u Gračanici: premijer Vlade Federacije Bosne i Hercegovine dr. Nedžad Branković sa svojim saradnicima posjetio općinu Gračanica, razgovarao sa Općinskim načelnikom, a potom posjetio Kompaniju "Širbegović" i prisustvovao

svečanom polaganju kamena temeljca buduće Poslovne zone

Tokom razgovora premijer Branković je obavijestio Općinskog načelnika da je Vlada Federacije BiH povelala aktivnost na obezbjeđenju planiranog granta za toplifikaciju Gračanice u iznosu od 1,5 miliona KM i na taj način snažno stala iza tog projekta. To je potvrdio i ministar energetike, rudarstva i industrije mr. Vahid Hećo, obavijestivši prisutne da je dio tih sredstava već uplaćen. U nastavku, Federalni ministar saobraćaja Nail Šećkanović obećao je da će u narednoj godini biti konačno riješena raskrsnica "Lipinac" na južnom ulazu u Gračanicu, dok je njegov kolega, ministar razvoja, poduzetništva i obrta Velimir Kunić, govoreći o podršci malom i srednjem biznisu, obavijestio prisutne da su neki skromniji iznosi odobreni za nekoliko proizvodnih projekata s područja općine Gračanica

Nakon posjete Općini, gosti su obišli proizvodne pogone Kompanije "Širbegović" i na licu mjesta upoznali sa uspjesima i budućim planovima ove renomirane građevinske firme, koja zapo-

šljava oko 700 radnika i raspolaže kapacitetima za izgradnju oko 600.000 kvadratnih metara proizvodnog i drugog prostora godišnje. Proizvodni pogoni firme smješteni su na površini od 135.000 kvadratnih metara sa dnevnim kapacitetom proizvodnje od 350 kubnih metara konstrukcije. Proizvodni asortiman čine: proizvodni pogoni, montažna gradnja, MM sistem, prednapregnute šuplje ploče, stolarija i čelične konstrukcije. Preko 50% svog prihoda Kompanija ostvaruje u izvozu, te se na taj način svrstava u vodeće izvozne firme u Bosni i Hercegovini. Radove izvodi širom prostora bivše Jugoslavije, od Podgorice i Prištine, preko Beograda i Sarajeva, do Zagreba, Ptuja i Maribora.

Pošto su obišli veliki proizvodni kompleks "Širbegović", gosti su se uputili na lokaciju buduće Poslovne zone, u Sprečkom polju, pored puta Gračanica - Sočkovac, gdje je obavljena ceremonija svečanog polaganja kamena temeljca za Poslovnu zonu "Širbegović", kojoj su prisustvovali brojni poslovni partneri te kompanije, mnogi građani i privrednici sa područja općine Gra-



Kamen temeljac za Poslovnu zonu "Širbegović": premijeri Nedžad Branković i Enes Mujić

čanica. Riječ je o velikom investicionom projektu od oko 70 miliona KM, na površini od pedesetak hektara, u koji "Širbegović grupa" ulazi s ciljem "da izgradi skup moderne poslovne infrastrukture sistemom ključ u ruke i iste komercijalizuje i učini dostupnim poslovnim subjektima i potencijalnim ulagačima". Radi se o prvom projektu ovakve vrste u BiH, koji će se realizovati u dvije faze. Interes za ulaganja i kupovinu tih prostora već je iskazalo nekoliko poslovnih partnera iz Bosne i Hercegovine i inostranstva.

Nakon prigodnih govora, kamen temeljac za ovaj veliki objektat zajedno su postavili Faruk Širbegović, općinski načelnik Nusret Helić, te kantonalni i federalni premijeri Enes Mujić i Nedžad Branković.

25. 10. 2007.

Toplifkacija Gračanice: počeli radovi na izgradnji toplane

Direktor "Eko toplane" d.o.o. Gračanica Hasan Mostarlić potpisao ugovor o izgradnji objekta toplane u ulici Sprečko polje (u blizini starog željezničkog mosta prema Karanovcu) sa gračaničkim firmama "Sagra" (ugovor potpisao vlasnik i direktor firme Sabahudin Avdić) i "Gramat" (ugovor potpisao vlasnik i direktor Jusuf Sejdinović). Nakon potpisivanja ugovora, koje je upriličeno u uredu općinskog načelnika, počeli su radovi na pripremi terena za budući objektat toplane. Riječ je o poslu vrijednom 700.000 KM. Početkom narednog mjeseca počinje isporuka toplovodnih cijevi i istovremeno odabir izvođača, potpisivanje ugovora i početak radova na toplovodu u dužini od 8.000 metara (prva faza) za dio grada južno od gračaničkog Doma zdravlja.



Toplifkacija Gračanice - potpisivanje ugovora sa izvođačima: "Sagra" i "Gramat"

31. 10. 2007.

Trideset druga sjednica Općinskog vijeća: rebalans Budžeta za 2007. u nacrt Budžeta za 2008. godinu

Budžet Općine za 2007. godinu iznosi 11.935.000 KM, od čega su prihodi u iznosu od 9.473.000 KM i primici 2.462.000 KM. S obzirom da je došlo do povećanja prihoda u iznosu od 1.385.000, Rebalansom je predviđen budžet od 13.320.000 KM. Razlog za rebalans budžeta nisu samo veći prihodi nego i potreba usklađivanja rashoda i izdataka, planiranje nekih novih izdataka koji su, između ostalog, rezultat određenih namjenskih prispjelih prihoda od viših nivoa vlasti za projekte kao što je toplifikacija, gradnja džamije u Sokolu, uređenje poljoprivrednog zemljišta, javni radovi, susret bratimljenih gradova i sl.

Kao što je navedeno, prihodi su povećani za 1.385.000 KM, od čega su porezni prihodi veći za 858.500 KM, neporezni za 56.500 KM, i grantovi-potpore tj. sredstva za toplifikaciju 470.000 KM. Kod poreznih prihoda došlo je do povećanja poreza na imovinu 209.000 KM, poreza na dobit pojedinaca i preduzeća 67.500 KM, indirektnih poreza 385.000 KM, poreza na plaće 100.000 i poreza na promet 90.000 KM. Neporezni prihodi povećani su zahvaljujući efikasnijoj naplati komunalnih i drugih taksa i naknada, dok su prihodi od imovine i administrativnih taksa manji. Najveći rast prihoda je po osnovu PDV-a u izno-

su od 380.000 KM, dom su rashodi u odnosu na plan (rebalansom od 9.473.000 KM) povećani za 1.055.000 KM i iznose 10.528.000 KM.

Razlika između prihoda i rashoda, odnosno izdataka iznosi 330.000 KM, što znači da je planiran suficit budžeta za 2007. godinu, koji će se usmjeriti u otplatu anuiteta kredita Svjetske banke i kredita kod dobavljača po projektu izgradnje putne infrastrukture iz zaduženja Općine u 2008. godini. Odluka o izmjenama i dopunama Odluke o budžetu Općine Gračanica usvojena je, uz zaključak da svi kapitalni projekti koji ne budu realizovani u ovoj godini budu prioritarno tretirani u općinskom budžetu za 2008. godinu.

Budžet Općine Gračanica za 2008. godinu (u nacrtu) predviđen je u iznosu od 11.383.000 KM, od čega su prihodi 11.083.000 KM, primici 300.000 KM, izdaci 10.542.000 KM, kapitalni izdaci iz zaduženja kod dobavljača 300.000 KM i višak prihoda nad izdacima - suficit 541.000 KM. Upoređujući sa rebalansom budžeta za 2007. godinu, Budžet za 2008. godinu je manji za 1.937.000.

Nacrt budžeta za 2008. godinu usvojen je uz zaključak da se do 5. decembra 2007. godine o njemu obavi javna rasprava.

Između ostalog, na ovoj sjednici usvojene su i sljedeće odluke: Odluka o građevinskom zemljištu, Odluka o povećanju visine naknade – paušala članovima Oćinskog vijeća i članovima stalnih i povremenih radnih tijela vijeća u prosjeku za 43,3 %, Strategija upravljanja razvojem ljudskih resursa Općine Gračanica, Informacija o stanju i potrebama nastavnog prostora i sportskih objekata u osnovnim i srednjim školama.

1. 11. 2007.

“Eurogalant” Gračanica: počela masovna proizvodnja ženskih torbi za italijansko tržište

Definitivno su sklopljeni dugoročni ugovori sa dvije renomirane italijanske firme “Nero Gardini” i AiG, čijom će se realizacijom znatno povećati obim proizvodnje u ovoj gračaničkoj firmi. Radeći za spomenute dvije firme, u prvih šest mjeseci ove godine kao probnom periodu, u “Eurogalantu” je ostvarena veća proizvodnja nego za čitavu 2005. godinu. Sklapanje ovih dugoročnih aranžmana omogućit će zapošljavanje novih 12

radnika, tako da na Zavodu za zapošljavanje neće više biti ni jednog KV galanteriste.

1. 11. 2007.

Tematska izložba “Branko Vajić – život i djelo”

Izložba posvećena ovom značajnom liku iz kulturne historije Gračanice otvorena u prostoru Zavičajno-muzejske zbirke i galerije, koju je upravo i utemeljio taj vrijedni entuzijasta, učitelj, direktor osnovne škole, arheolog amater, čovjek širokih interesovanja i nemirnog duha. Zato svaku pohvalu zaslužuje Bosanski kulturni centar kao organizator i mladi profesor historije Edin Šaković kao autor izložbe o tom vrijednom i zaslužnom, ali već gotovo zaboravljenom čovjeku, koji je ostavio neizbrisive tragove u društvenom i kulturnom životu Gračanice u drugoj polovini 20. stoljeća. “Dugi niz godina”, kako je rekao autor izložbe prilikom njenog otvaranja, “istraživao je prirodno i kulturno naslijeđe svog zavičaja. Otkrio je mnoga arheološka nalazišta (uključujući i sadašnji nacionalni spomenik BiH – Korića Han), uspostavio saradnju sa muzejima, osigurao im preduvjete za istraživanja, te pružio svaku drugu vrstu pomoći. Znatan je doprinos dao i istraživanju termalnih i mineralnih voda, te formiranju zbirke zavičaja u Gračanici...” O liku i djelu Branka Vajića nadahnuto je govorio nekadašnji predsjednik opštine Gračanica Ćamil Naimkadić.

10. 11. 2007.

“Isowood” Gračanica: jedini proizvođač multipleks kuhinjskih ploča i plivajućih podova u regionu

Za samo dvije godine postojanja ova drvopredrađivačka firma, osnovana holandskim i domaćim kapitalom, orijentisana uglavnom na strano tržište (97% proizvodnje), dostigla je izvoz od 3 miliona eura godišnje. Najviše izvozi u Holandiju, Njemačku, Italiju, Belgiju, Hrvatsku i Srbiju.

14. 11. 2007.

Okrugli sto „O književnom stvaralaštvu Zlatka Dukića“ u Gračanici

Ovaj skup organizovala je Redakcija časopisa „Gračanički glasnik“ uz pomoć Bosanskog kulturnog centra i pod pokroviteljstvom načelnika Općine Gračanica Nusreta Helića. Referate na

skupu: mr.sc. Omer Hamzić („Zlatko Dukić (i) književnik i novinar - kratak pregled), književnik Atif Kujundžić („Zlatko Dukić, novinarska i spisateljska pojava - fenomenološka skica“), dr. Srđan Vukosavljević („Neposredno i književno iskustvo kao demijurg dramskog teksta Zlatka Dukića“) i mr. sc. Anisa Avdagić („Iskazati činjenje: performativnost (jezika) u pričama Zlatka Dukića“). Odlomke iz Dukićeve proze govorio je mladi glumac iz Tuzle Irfan Kasumović. Referati i diskusije sa ovog skupa objavljuju se u ovom, 24. broju „Gračaničkog glasnika“, koji je tematski posvećen književnom i publicističkom opusu Zlatka Dukića.

23. 11. 2007.

Vladika Zvorničko-tuzlanske eparhije srpske pravoslavne crkve Vasilije Kačavenda prvi puta poslije rata službeno posjetio općinu Gračanica

U kraćem razgovoru sa načelnikom općine Nusretom Helićem, predsjedavajućim Općinskog vijeća Hasanom Fehratovićem i njihovim saradnicima Kačavenda je pohvalio korektnu saradnju lokalne vlasti sa predstavnicima srpske pravoslavne crkve, dobar odnos prema crkvenoj imovini, objektima itd. U tom smislu zatražio je da u narednom periodu općina podrži vanjsko uređenje srpske pravoslavne crkve kao jedan od dominantnih i reprezentativnih objekata u centru Gračanice, koji će kao spomenik kulture uskoro biti stavljen „pod zaštitu države“. Drugi zahtjev je bio da se do završetka postupka restitucije zgrada bivšeg Vojnog odsjeka u Gračanici, koju je u Kraljevini Jugoslaviji koristilo udruženje „Kolo srpskih sestara“ dadne na korišćenje Srpskoj pravoslavnoj crkvi, za kancelariju i stan za pravoslavnog sveštenika. Dogovoreno je da općina snažnije, u granicama mogućnosti, podrži povratak srpskog stanovništva u svoje prijeratne domove na području dva Skipovca, Lendića i Lohinje.

23. 11. 2007.

Reprezentativnom izložbom akvarela i ulja Hajrudin Junuzović (rođ. 1934.) obilježio pola vijeka svog stvaralačkog rada i angažmana u

oblasti prosvjete, kulture i likovne umjetnosti u Gračanici

O rezultatima koje je Hajrudin Junuzović postigao na svojoj bogatoj i zanimljivoj životnoj stazi, prilikom otvaranja izložbe, pred mnogobrojnim ljubiteljima likovne umjetnosti i poštovaocima njegovog djela, nadahnuto je govorio Osman Puškar, prije svega kao o svom prvom učitelju, pedagogu i entuzijasti - koji je ostavio vidne tragove u društvenom i kulturnom životu Gračanice, posebno u Kulturno-umjetničkom društvu „Adem Alić“, kao njegov aktivni član, voditelj likovne sekcije i dugogodišnji predsjednik. Kao slikar-amater Hajrudin Junuzović „radi crteže, akvarele, ulja, pastelom, grafike, a primjenjuje i druge tehnike“, što se tiče tematskog okvira njegovog likovnog stvaralaštva, činjenica je da mu je, kako reče Puškar, preokupacija portret i pejzaž, bogat bojama i dubinom prostora. Njegove „slike govore o autoru vedrog duha, proste i poštene duše i istančanog osjećaja za boju, formu, liniju i prostor.“ Proglašavajući izložbu otvorenim, načelnik općine Gračanica Nusret Helić posebno je istakao predanost poslu i zavidan talent autora.

25. 11. 2007.

Povodom Dana državnosti Bosne i Hercegovine na zgradi Opće bolnice „Dr. Mustafa Beganović“ otkrivena obnovljena spomen-ploča izginulim partizanima

Na spomen-ploči ispisan je sljedeći tekst: *„Noću, između 16. i 17. februara 1944. godine, u borbi protiv domobrana, bosanskih planinaca i Nijemaca, na ovom mjestu poginulo je osamnaest boraca 5. i 2. vojvođanske narodnooslobodilačke udarne brigade. U znak sjećanja, podižemo im ovu spomen-ploču 27. jula 1957. godine*

Savez boraca NOR-a Gračanica

Obnovljena, 25. 11. 2007. godine UABNOR-a Gračanica“

Na prigodnoj svečanosti, u prisustvu mnogih Gračanlija, spomen-ploču otkrili su Sulejman Devedžić, predsjednik Udruženja antifašista i boraca narodnooslobodilačkog rata (UABNOR-a) i Nusret Helić, načelnik općine Gračanica.